

PAS Akan Berjuang Habis-Habisan Rampas Negeri 'Deposit Tetap' Umno
mStar Online
Mei 22, 2012
Oleh SUSAN ALBERT KASSIM

KUALA LUMPUR: Naib Presiden PAS, Datuk Mahfuz Omar menegaskan parti itu akan berjuang habis-habisan untuk merampas negeri yang dianggap sebagai 'deposit tetap' Umno terutamanya, Johor pada pilihan raya umum ke-13 (PRU-13).

Malah, beliau turut yakin hasrat itu dapat direalisasikan menerusi tindakan berani Ahli Parlimen Kubang Kerian, Salahuddin Ayub yang menyatakan kesanggupannya untuk bertanding sebagai calon di Johor.

"Saya puji tindakan berani beliau (Salahuddin) tinggalkan Kubang Kerian yang boleh dianggap sebagai kubu selamat PAS. Dia tak perlu berkempen...jika tinggalkan songkok saja pun dia boleh menang," katanya pada sidang media di sini, Selasa.

Menurut beliau, Salahuddin sanggup mengambil risiko bertanding di negeri kelahirannya selepas mendapat maklumat dan mandat daripada rakyat yang inginkan perubahan.

"Isyarat jelas menunjukkan bahawa kita serius dan akan beri tumpuan sepenuhnya di Johor dan beberapa negeri 'deposit tetap' Umno," katanya.

Jumaat lalu, Salahuddin yang juga naib presiden PAS mengesahkan beliau tidak akan mempertahankan kerusi parlimen yang dimenangnya pada pilihan raya umum 2004 dan 2008.

Pada masa sama beliau turut tidak menolak kemungkinan akan bertanding di kerusi Dewan Undangan Negeri (DUN) dan juga kerusi Parlimen di Johor.

Selain Johor, Sabah dan Sarawak turut dianggap sebagai negeri 'deposit tetap' Umno.

Dalam perkembangan berasingan, Mahfuz meminta semua pihak supaya berhenti menimbulkan isu pengunduran Presiden PAS, Datuk Seri Abdul Hadi Awang daripada bertanding pada PRU-13.

"Itu cerita lama. Sekarang tidak timbul lagi soal beliau (Abdul Hadi) nak berundur. Kita turut menolak cadangan tersebut dan beliau akur dengan keputusan pimpinan parti," katanya lagi.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/5/22/mstar_berita/20120522142655&sec=mstar_berita